

mois. Voici comme la chose arriua. Les Peres estant à *Ouenrio* apprirent qu'un petit enfant estoit à l'extremité; ils coururent & le baptiferent, il mourut auant hier; de là ils allerent iufques à *Onnentifatj* pour visiter un nommé *Onendich* un des premiers suppofts du Sorcier *Sondacouané*; qui leur parla comme un homme qui estoit en estat de se guerir, & qui n'auoit pas avec cela beaucoup de disposition à recevoir des auis touchant son salut. Mais sans doute quelque Ange du ciel conduisoit leur pas, on leur donna auis de se transporter à une petite cabane dressée à l'escart dans les [214] champs, & qu'il y auoit une femme malade qui seroit bien aise de les voir: il se presenta mesme un ieune homme plein de bonne volonté qui les y conduisit: mais le malade qu'ils alloient voir estoit desia sur pieds. Ils estoient sur le point de s'en retourner, lors qu'ils entendirent une voix plaintiue qui leur fit demander s'il y auoit quelque autre malade; on respondit que oui, qu'il y auoit dehors une femme qui tiroit à la fin. De fait ils la trouuerent couchée sur quelques feuillages, & exposée aux ardeurs du soleil: ceste pauvre femme venoit d'accoucher deuant terme d'un enfant mort, il sembloit qu'elle n'attendist plus que le baptême, dès le lendemain elle mourut. Au retour ils passerent par *Anonatea* selon qu'ils auoient ordre du P. Superieur pour visiter encor une femme malade, mais elle estoit morte dès le iour de la Pentecoste. Ils se trouuerent là tout à propos pour instruire & baptiser un pauvre vieillard que nous ne scauons pas estre malade, nous lui auons pensé trois ou quatre mois durât quelques vlceres qu'il auoit aux pieds, dont il commençoit à se mieux porter: il a esté emporté en peu de iours: